

মাতৃ-বন্দনা

নিরাপত্তা প্রহরীরা তোকে ঘিরে রাখে,
তুই কবে ভি.ভি.আই.পি. হলি ?
(ভি.ভি.আই.পি. মানে জানি
প্রেসিডেন্ট, পি.এম., সি.এম.)
আমাদের নিরাপত্তা তোরই হাতে অর্পণ করেছি -
তুইও জেড প্লাস হ'লে আমরা আজ দাঁড়াবো কোথায় ?

তুই তো অন্নদাতা, বিপদতারিণী,
দনুজদলনী তুই, দুষ্টবিনাশিনী তুই, শিষ্টের পালিকা -
তথাপি অন্দরে তুই পুলিশ বেষ্টিতা, মা-গো, তোকে
দেখতে হ'লে বুক পাতে হয়
বুলেটের নীচে, ঘাড় নীচু ক'রে মেনে নিতে হয়
অস্ত্রের আঘাত.....

বরাভয়দাত্রী তুই, সাহসপ্রদায়ী, তবু তোর
কতো ভয়, কতো শংকা, কৃষমার্জারের ঘেরাটোপ
অথচ আমরা থাকি তোরই ভরসায় -
বিপন্ন জননী, বল্, আমরা আজ দাঁড়াবো কোথায় ?

নিছিদ্র প্রহরা তোর, ভাগ্যবান হ'লে কেউ কেউ
তোর কাছে যেতে পারে, তোর পদধূলি পায়, তাও
অগ্নি পরীক্ষা দিয়ে, মেটাল্ ডিটেক্টার অনুমতি দিলে.....

অভয়দায়িনী, তুই ছেলেদের এতোটা ডরাস্!
ভয় হয়, ছেলেরা কি মাতৃঘাতী সবাই! জননী,
তা হ'লে কেমন মাতা? ভীত - ত্রস্ত আমরা তোরই ছেলে -
এক পা মাটিতে, আর এক পা বাড়ানো আছে জেলে

দশপ্রহরিনী, তবু নিরাপত্তা - বলয়বেষ্টিতা, মা - গো, বল্
(সর্বত্রই ছড়ানো আছে জিঘাংসার তীক্ষ্ণতম কাঁটা!)
আমরা আজ দাঁড়াবো কোথায় ?

অমিয়কুমার সেনগুপ্ত

